

# BOTAD

OPISYAL A PABLAAK TI REBOLUSYONARYO A TIGNAYAN TI KALINGA

TAWEN 7; BILANG 1

ESPESYAL NGA ISYU

IPASA NO MABASA

## Kangatoan a pammadayaw para kada Kadua a Rudy Daguitan ken Kadua a Nora Miguel: Nabaknang a kapadasan, tarabay para iti masakbayan



**M**arso 15, 2021, napasamak iti 3:15 ti malem ti labanan iti baet ti maysa a yunit ti Lejo Cawilan Command (LCC-NPA-Kalinga) ken ti yunit ti 50IB-PA sadiay Barangay Gawaan, Balbalan, Kalinga. Iti labanan ket natamaan ni Ka Pinpin a nagresulta iti dagus a pannakatay na. Bayat met a natamaan ni Ka Lanie, naitras ken tinameng isuna dagiti kakadua ngem idi parbangon ti Marso 16 ket natay isuna gapu iti kangrunaan kadagit sugat na a tama iti boksit.

### Sinnogon ken suroten ti sumaruno ti pakaistoryaam

**S**innosinnogom akay, maysa kadagiti rebolusyonaryo a kanta a naggapu kenka ti tono na. Kanta para iti panagnom ti maysa a rebolusyonaryo. Malagip ko nu kasano tayo a kinompos ken ti kasasaad ti rebolusyonaryo a tignayan iti daytoy a panawen. July 1989 a naipinal ken rugi a maisaknap iti pwersa ken masa. Immuna a kinanta tayo iti miting ti municipal organizing committee iti Pinukpuk. Sika ti nangiyuna gapu ta kabisadom ti tono na. Permi ti katawam kalpasan na ken ti ragsak mo a mangipalawag iti kayat na a saoen ti *sinnogom*.

Wen, naulimek ka ngem nalawa ken nauneg ti panpanunotem, nagaget ken naanus, naayat nga asawa ken ama, pinarimbaw mo ti interes ti marigrigat a dasig, kanayon ka a nakasagana kadagiti rebolusyonaryo a rebbengen, rigat ken sakripisyo. Daytoy ti kagagalad mo., Rudy Daguitan alyas Ka Pinpin, Abay, JC, OG, Bito, Sixto. Naiyanak idi Marso 16, 1963 idiy Mangali, Tanudan, Kalinga. Maikadua nga anak, mannalon

dagiti parentes na a naggapu iti maysa a dakkal a clan iti tribo da. Nageskwela iti Elementarya idiy Mangali Central School. Naghigh school iti Tanudan Vocational High School (TVHS) idiy ili da. Nagkolehiyo ken naturpos na ti Bachelor of Science in Commerce (BSC) idiy Mountain Province College idiy Bontoc, Mountain Province.

Apaman a makastrek ti nauna a yunit ti NPA iti Lubo, Tanudan idi 1976 ket napardas ti ekspansyon

da iti Mangali, Talococ ken kadagiti baryos/il-ili a maapektaran iti uppat a dam ti Chico River a plano ti rehimen US-Marcos. Adda iti high school ni Ka Pinpin idi makita na ti NPA nga agpalpalawag babaen kadagiti mass meeting, schooling kasilpo kadagiti isyu ti umili kas iti dam, ti ramut ti panagrigrigat ti umili, ania ti rebolusyon, ania ti NPA ken ti kinabulok ti sistema ti gimong. Nagbalin a silulukat ni Ka Pinpin nga agsaludsod, agdengngeng ken agadal ken uray dagiti kankanta ti NPA. Immuna a nangngeng ken inadal na ti kanta nga "Mangmangged ken Mannalon Agriing Ka", "Oh Marcos Baleleng ti Nagplano ti Biggest Dam iti Chico". Aglalo nga umuneg ti awat ken suporta na idi sumampa iti NPA ti kailian na ken kalpasan ti umuna ken maikadua a taktikal nga opensiba ti NPA iti Kalinga.

Idi nagkolehiyo ket dagus a nasilpoan isuna gapu kadagiti isyu ti kabataan-estudyante ken ti isyu ti nailian a minorya iti kabuklan a problema a sagsagrapien ti umili a bunga ti kinabulok ti sistema ti gimong. Dakkel met laeng ti tulong ni manong na a naun-una namulat ken dagiti aktibo a kakailian ken estudyante iti daytoy a panawen.

Gapu ta silulukat ken aktibo ni Ka Pinpin a dumar-ay kadagiti innadal mainaig iti kasasaad ti gimong a Pilipinas ken ti rebolusyon a Pilipino inggana nagbalin a kameng ti rebolusyonaryo nga organisasyon ti kabataan. Pinag-adalan ken Inyaplikar na ti Marxismo-Leninismo-Maoismo (MLM), sumampa kas kameng ti Partido Komunista idi 1984. Umuneg ti awat ken komitment na iti rebolusyon, nagdesisyon kas fulltime organizer iti ekswelaan ken ti asideg a komunidad kabayatan nga itultuloy na ti panag-eskwela na.

Idi 1986-87 ket timmulong isuna a nangipalawag iti umili kasilpo iti killo ken panagsuko a linya ti CPLA, uray nu napadasan da kenni manong na ti panangharass, pamutbuteng ti CPLA kadakuada. Dito met laeng a panawen nga isagsagana na ti panagsampa na iti NPA tapno tumipon iti armado a pannakidangadang.


Hulyo 1988 a mapanggeddeng a sumampa ni Ka Pinpin iti NPA. Pinasangbay ti maysa a yunit ti NPA -Kalinga ken masa isuna iti maysa a baryo ti Pinukpuk. Dagus a pinag-adalan na ti biag ken rebbengen ti NPA. Dagus met a pumaset kadagiti innadal ken pangkultural a maibingbingay ken iwaywayat ti NPA ken masa.

Setyembre 1988 ket naipauneg isuna iti pamprobinsya a grupo a mangtalmeg iti panagpadur-as iti programa para iti rebolusyonaryo nga agraryo, lalo itil panagpaadu ti apit a pagay, natnateng, panag-usar iti organic fertilizier, panagtaraken kadagiti dinguen ken ti kasilpo iti salun-at ken sanitasyon.

Hunyo 1989 ket naipauneg isuna kas kameng ti District Committee a nangsakop iti Balbalan-Pinukpuk ken ti sumagmamano a baryo ti Upper

Tabuk. Napardas ken naipangato dagiti rebolusyonaryo nga organisasyon ti umili, ti agraryo a rebolusyon, ti panagbukel kadagiti milisyang bayan, dagiti sangay ti Partido manipud baryo inggana tukad ti tipak ken munisipyo. Nasaknap met dagiti naiwayat a taktikal nga opensiba ken nagtultuloy a dumakkel ti pormasyon ti Hukbo.

Iti bangir na ken panawen ti disorientasyon, isunga idi maiwayat ti Maikadua a Naindaklan a Tignayan a Panangilinteg (MNTP) ken naigiddan ti naranggas nga Oplan Lambat Bitag ti Rehimen US -Ramos ket tumakder latta ni Ka Pinpin ken dadduma pay a kakadua, saan a naapektaran ti pangngeddeng da, nagpursige nga agilinteg ken



ituloy ti panagrebolusyon. Aktibo a nangipalpalawag kasilpo iti MNTP ken ti kinakasapulan nga arakupen daytoy ken subliyan dagiti basaran a prinsipyo. Maysa ni Ka Pinpin kadagiti kakadua a nangadal ken nangiyaplikar ti panagsubli iti basaran a prinsipyo iti panag-organisa.

Kas paset ti pananglinteg ken panagsimpa ket nabukel ti Kalinga Front Committee idi 1993. Maysa ni Ka Pinpin a kameng na daytoy ken naidisposisyon isuna iti yunit a nagtignay iti Lubuagan, Pasil, Tinglayan, Tanudan ken Upper Tabuk. Saan na a pinagkedkedan daytoy a nadagsen a rebbengen, nagtalinaed isuna inggana 1994.

Ti dakkal a rebbengan para iti MNTP ket ti panaglagom iti 25 a tawen a rebolusyonaryo a kapadasan iti Kalinga. Maysa ni Ka Pinpin a nakadar-ay iti daytoy. Naipalpas ken adu, nabaknang dagiti ad-adal ken nakaaramid kadagiti partikular a resolusyon nga isu ti napateg a tarabay dagiti yunit para iti panagbangon ken panangiyabante ti rebolusyonaryo a tignayan iti probinsya.

Ti panangidaulo ni Ka Pinpin iti maysa a yunit ket adu a masa ti nabenebisyoan kadagiti kampanyang masa a naiwayat, uray ti riri iti daga, partikular a problema ti umili, tribal war ket dakkal ti pinaset ti rebolusyonaryo a tignayan iti panagrisut kadagito. Nalaka nga idanun ti masa dagiti partikular a parikut da iti kakadua tapno marisut iti rebolusyonaryo a wagas.

2016 ket naipauneg kas kagawad ni Ka Pinpin iti Komiteng Larangan babaen iti tarabay ti Maikatlo a Tignayan a Panangilinteg ken ti panawagan iti Partido iti kabuklan a panagrimbaw ken panag-abante ti rebolusyonaryo a tignayan para iti panaggun-od ti nangatngato a tukad ti gubat ti umili. Daytoy ti awit-awit ni Ka Pinpin ken Ka Lanie nga rebbengen para iti panag-abante ti nadumaduma a beneg ti trabaho ken ti naindaklan a misyon ti masya a proletaryado.

### **Doktora ti umili, natured a mannakigubat, rebolusyonaryo nga ina**

**M**aysa a rebolusyonaryo nga ina, natured a mannakigubat ken doktora ti umili dayta ni Nora Miguel Malyas Ka Lanie, Ka Gimay ken Ka TM. Naiyanak isuna idi Nobyembre 20, 1970 idiaiy Bonnog, Wagod, Pinukpuk, Kalinga. Napobre a mannalon ti dasig dagiti nagannak na ken naggapu da iti tribo ti Limos ken Matucad. Maika-lima isuna iti sangapulo ket maysa nga agkakabsat.

Gapu iti kinarigat ti biag ket kinakasapulan a timmulong iti pangkabiagan ti pamilya ket saan a nakastrek isuna iti burges nga eskwelaan. Ubbing pay laeng ni Ka Lanie idi ngem ti panpanunoten na ket nu kasano a makatulong isuna iti inaldaw-aldaw panagbiag ti pamilya da ken iti komunidad.

Umuneg ken limmawa ti pannakaawat na iti kasasaad nu apay marigrigat ti biag da babaen iti panagdenggeg ken panagadal na kadagiti rebolusyonaryo a kankanta ken pabpabuya dagiti NPA nga agtigitignay iti lugar da. Kayat na a sumampa idi 1987 ngem saan a pinalubusan dagiti kakadua gapu ta awan pay 18 ti tawen na, isunga nakipaset isuna kadagiti kampanyang ken trabaho a pangsalun-at iti komunidad da ken iti kabangibang a baryo a gargarawan ti NPA.

Idi 1988, sumampa ken sumurot isuna kadagiti kakadua, timmulong isuna kas medical aid iti provincial medical group idiaiy a panawen. Uray saan a nakaeskwela iti burges nga eskwelaan, naadal ni Ka Lanie ti agsurat ken agbasa babaen iti napasnek a pannakipaset na iti literasi ken numeracy program ti NPA. Kabayatanna ket padpadur-asen na met lang ti laing na iti pangmedikal a trabaho nga isu ti kangrunaan nga interes na nga adalen. Adu a medikal treyning ti inatendaran na inggana nadanon na ti tukad a frontline weno combat medic. Dagiti naadal na ket inyaplikar saan laeng kadagiti sugatan ken agsakit a kakadua nu di ket uray kadagiti sugatan a kabusor iti panawen ti labanan kas panangbigbig

iti karbengan-tao ken *medical ethics*. Natured isuna a mangiyatras kadagiti kakadua a sugatan uray iti tengnga ti labanan, saan nga agkedked uray kasano kagrabe ti sugat dagiti kakadua ket ipakat na latta ti kabaelan na a mangagas. Kadagiti adda saksakiten na a kakadua ket saan isuna nga agbain ken agduadua a mang-asikaso nu kasapulan nga arikapen na ti ayan ti nasakit iti bagi ti kakadua ken masa ket iyaramid na tapno laeng maammuan na nu ania ti gapu ti sakit ken dagus a mangted ti pangbuya ken pamuspusan tapno mapaimbag ti marikrikna ti pasyente. Awan ti birukem ken yana iti tungtongan ti panagtameng, naanus isuna a mangtaripato kadagiti kakadua ken masa nga addaan sakit. Maysa met lang ni Ka Lanie a kanayon a biruken ti masa nu agsakit ti ngipen da gapu iti kaammuan na iti panagparut. Adu a masa ti nabenebisyoan kadagiti medikal ken dental services nga insayangkat ti kakadua, maysa ni Ka Lanie nga aktibo a nakipaset kadagito.


Babaen iti panangipraktika ni Ka Lanie kadagiti inadal na kadagiti medikal treyning ket napadur-as na ti bukod na a kinalaing ken kabaelan pangmedikal. Laksid kadagiti pormal a treyning pangmedikal ket nagaget isuna iti panagadal kadagiti nadumaduma a praktika ti panag-agas kas iti panagugar ti herbal ken acupunture. Ti laing na iti herbal nga agas ket naadal na manipud iti pannakikadua ken panagsaludsod na kadagiti masa ken babaen met lang iti bukod a praktika na. Saan a nagpatingga isuna kadagiti innadal nga inted ti

kakadua nu di ket nagtultuloy iti panagkalap iti napaneknekan a kapadasan dagiti umili iti panag-agas iti saksakit nga isu met lang ti isursuro na kadagiti kakadua ken masa. Isuna met laeng ti nangiyun-una iti praktika ti kampanya ti kakadua maipanggep iti kanadalu, “ti kinadalu ket wagas ti panaglapped iti sakit” kanayon a kuna ni Ka Lanie.

Kas kameng ti Partido Komunista, malaksid iti medikal a trabaho, adda met laeng dagiti nadadagsen nga rebbengen nga inakem na ken naipatungpal na dagitoy nga awan duadua, natured a mannakigubat ken mangidaulo isuna. Nalaing a makilangen ken asideg isuna iti masa gapu kadagiti praktikal a propaganda ken tulong na kenyada. Umak-akem a tim lider kadagiti sumagmamano a misyon. Nalaing nga agadal ti tereyn ken kabisado na ti masa iti erya. Adu dagiti dadakkel nga aktibidad nu sadinno ket dakkel ti pinaset na iti trabaho nga istap, awan ti mabisin ken kanayon a nasayaat ti kasasaad ti kusina nu adda ni Kadua a Lanie. Nagaget ken naalibtak met lang ni Ka Lanie iti agreb a trabaho, nagaget a nakipaset kadagiti kampanya a masa para iti panagpaadu ti mula a makan ken herbal.

Maysa ni Ka Lanie kadagiti babai a mapanggeddeng nga umarakup iti armado a rebolusyon. Maysa isuna kadagiti rebolusyonaryo nga ina a nangipaay iti dekadangada a biag na tapno pagserbian ti nalawa nga umili. Inarakup na ti sakripisyo a panawan dagiti annak ken pamilya a naggapuan na para iti nalawlaw a panagserbi. Iti bangir ti kinatured na, saan a napunas ti rikna na kas maysa nga ina. Adda dagiti panawen a saan na a maibturan ti iliw na kadagiti annak na ngem nu man pay kasdiy ket pinarimbaw na latta ti pagkarebolusyonaryo na. Nu man pay adayo isuna kadagiti annak na ket saan na latta a malipatan isuda - iti - inaldaw-aldaw a panagtignay na, inkagumaan na latta nga ipaay amin a kabaelan na tapno maipatungpal dagiti rebbengen kas ina kenyada ken kas maysa a nalabbaga a mannakigubat nga agserserbi iti masa.

Ni Ka Lanie ket maysa nga inspirasyon nangruna iti pannakilaok dagiti babai iti armado a



pannakidangadang tapno punasen ti pannakaidadanes ken pannakagundaway a sagsagrapen dagiti kababaihan. Saan a lapped ti kinababbai, pisikal a limitasyon ken kaaddaan ti pamilya ken annak tapno makipaset iti armado a pannakidangadang. Rinimbawan na ti pyudal a panagbuya kadagiti babai ken pinaneknekan na a dakkel ti papel ken paseten dagiti babai tapno rebbeken ti mangidadanes nga agtuturay a dasig ken sukatan ti bulok a sistema ti gimong.

### **Panangpetpet iti rebolusyonaryo a tarabay, panagbukel ti rebolusyonaryo a pamilya**

**1** 993 a napadur-as ti rikna, ayat da Ka Pipin ken Ka Lanie inggana iti panagbukel da iti maysa a rebolusyonaryo a pamilya. Naiyakar da nga agasawa iti yunit a nagtignay iti Balbalan. Ditoy a naiyanak ti nauna nga ubbing da iti maudi a paset ti 1994. Nagtalinaed ti disposisyon da nga agasawa iti yunit a nagtignay iti Balbalan ken pokus ti trabaho da ket ti konsolidasyon ti Hukbo ken masa lalo ti kampanya para iti MNTP.

Manipud 1999 ket nagtalinaed ti disposisyon da nga agasawa, babaen iti tarabay ti MNTP ken ti resulta ti panaglagom ti rebolusyonaryo a kapadasan iti probinsya ken naiyabante manen dagiti nadumaduma a rebolusyonaryo a trabaho ken nasubliyan met dagiti baryo a nabayag a saan a natignayan. Inannatupan met dagiti yunit nu kasano

nga agtignay iti militarizado a lugar ken adu a CAFGU detatsment. Adu a kameng ti CAFGU ti ummikkat gapu iti pampulitika a panangipalawag kenyada ken kadagiti labanan a naiwayat ti Hukbo.

Manipud 2010 ket pumauneg da Ka Pinpin nga agasawa kadagiti naidisposisyonan da gapu kadagiti kasapulan ti organisasyon para iti



panaggun-od ti kabuklan ken partikular a panag-abante. Dagiti nabaknang a kapadasan da ket maibingbingay ken padpadur-asen da iti ania man a yunit a pumaunegan ken idadauloan.

Inggana ti maudi nga anges da Ka Pinpin ken Ka Lanie nga agasawa ket naipakita da ti kinapudno, kinapinget ken managsakripisyo a kagagalad da. Dagiti naurong da nga ad-adal, kinalaing, kapadasan ket inpatawid da iti sumarsaruno a henerasyon ti rebolusyonaryo a pwersa ken masa para iti aglalo pay a panag-abante inggana ti panagballigi ti rebolusyon.

Salamat Ka Pinpin ken Ka Lanie, dagiti naibati yo ket armas ken tarabay mi ken ti masa a mangitultuloy iti atiddog a panagdaliasat iti dalan a napnuan dara ken siit iti naunday a gubat ti umili para iti pananggibus iti bulok a sistema ti gimong ken panaggun-od ti pudno a demokrasya, wayawaya ken hustisya.

### Ti pannakatay da ket mangsarming iti panangirteng ti gubat

**D**agiti armado a labanan iti baet ti NPA ken kas iti AFP ken PNP ket paset ti naunday a gubat ti umili. Tarigagay ti umili a maaddaan ti pudno a wayawaya manipud iti imperyalista a panagsakup iti pagilian ken demokrasya kas iti karbengan iti nagtaudan a daga ken bukod a pangngeddeng. Isunga kadagiti armado a labanan mabuya tayo ti resulta ti umir-irteng a risirisan ti dasig, nu kasano nga panangpunas iti nainsigudan a puli. Ket iti bangir na met ti pananglaban ti umili.

Iti Kalinga, a kas iti nadumaduma a paset ti Pilipinas, mapaspasamak iti *development aggression*. Iti nagan kano ti panagdur-as, maipatakder dagiti proyekto a kas iti minas, dam, geothermal a mang-agaw iti karbengan iti daga laksid pay iti panagdadael iti aglawlaw. Madama a maipatakder ti Kalinga Geothermal Project sadiay Balatoc, Pasil. Adda met laeng dagiti panggep dagiti kapitalista a serye ti dam iti karayan ti Chico, Pasil, Tanudan ken Saltan. Kasta met a tuloy latta ti Chico River Pump Irrigation Project. Dagiti met baro nga apo't daga ken kapitalista ti agrikultura ti mangparparigat kadagiti mannalon iti nangato a presyo ti magatgatang ken inputs, nangato nga interes iti pautang, ken nababa a presyo ti produkto ti mannalon. Agtultuloy ti panangagum ti daga kadagiti marigrigat a mannalon kas *colateral* iti utang iti apo't daga ken panangconvert iti daga para iti turismo. Dagiti kakumplot dagitoy a kapitalista a burukrata/upisyal ti gobyerno ti agnam-ay kadagitoy. Isunga ipingpinget da a lappedan ti amin a pananglaban ti umili kadagitoy a *development aggression* ken pyudal-malapyudal a pananggundaway.

Dagitoy a pang-ekonomiya nga interes ket naidisenyo ti Oplan Kapanatagan ti rehimen US-Duterte. Panggep na a buraken ti rebolusyonaryo a tignayan ken amin nga oposisyon. Binukel ti NTF-ELCAC tapno amin nga ahensya ket koordinado ken pwersado a mausar ti reaksyunaryo a

gobyerno tapno magun-od daytoy a panggep. Pinagbalin a gagangay ti panangpatay ken panangbutbuteng ti rehimen US-Duterte. Mangpakaro daytoy iti pananggundaway ken militarisasyon iti pagilian. Mangiduron met daytoy ti panag-irteng ti tignayan ti umili ken panangiyabante ti rebolusyon.

Karbengan ken rebbengen ti tunggal tao a salakniban ti biag, dayaw ken bukod a pangkeddeng ti pada na a tao. Daytoy ti taktakderan ti tunggal rebolusyonaryo. Inted dagiti Hukbo ti umili ti amin a panawen, laing, pigsa ken sakripisyo para iti daytoy a panggep tapno iti masakbayan ket saan a sagrapen ti sumarsaruno a kaputotan ti pananggundaway. Awan kabatog ti naited a panawen, sakripisyo ken biag da Ka Pinpin ken Ka Lanie. Napanday da kas rebolusyonaryo ken inted ti ingga't kabaelan da. Ti pannakatay da ket mangsarming iti panangirteng ti gubat ken mangibaga a kasapulan a tuloy-tuloy ti panagdur-as ti gubat ti umili ken kinakasapulan iti ad-adu pay a tumipon iti yunit ti NPA. Ti armado a pannakidangadang ket resulta ti tignayan masa tapno magun-od ti pudno a wayawaya ken dagiti pampulitika ken pang-ekonomiya nga interes ti umili. Iti kastoy laeng maikkan tayo ti hustisya amin a biktima ti reaksyunaryo nga estado ken mangted dayaw iti lagip dagiti rebolusyonaryo a martir tayo.

# NATAN-OK A LAGIP

(Daniw ni Ka Shen para iti Pulong-Parangal da Ka Pinpin ken Ka Lanie)



Napanawan dagiti lagip ti panawen  
 Leddaang ken naragsak a pagteng  
 Kanayon a nakadulin iti puso ken nakem  
 Malagip dakayo ken dagti adu nga arapaap  
 a sipupuso tayo nga insabiag iti naglabas nga  
 apagbiit ngem narikot a maysa a tawen  
 Aldaw man ti selebrasyon, medikal misyon, pulong,  
 GM, wenno produksyon

Ti pannakiranget kadagiti naririgat a ruta  
 iti kalubuan ken katapukan  
 iti panawen ti bagyo ken panagtutudo  
 Ti situred a pannakirinnupak iti napipigsa a  
 karayan, ken dagiti saan a mabilang gedday  
 iti naririgat a balsutan a pangisirsirukan kdgti  
 nadadagsen a makoto nga awit-awit tayo iti  
 agmalem tapno laeng makadanon iti masa  
 a pinagdatunan tayo iti amin-amin

Agsaibbek ti rikna iti tunggal lagip  
 iti binigat a ritwal iti kusina,  
 iti tunggal malem ta panawen manen ti  
 panagpapatang ken panagkonsulta  
 iti misyon ken bunag a kakuyog ka  
 inggana iti kasasaad a kasapulamon  
 a pumakada ken sumina

Kasla awan patingga na ti kumarayo a rikna  
 Malagip ka iti adu a sagubanit ti kakadua  
 Kas iti kadawyan nga ina  
 Adu a sao ken pammabbaga

ngem ti kabaelam ket ipakat mo latta  
 tapno matameng ti rikriknaen da  
 Kanayon mo nga ibaga,  
 "Saan met a nakaro, gagangay na dayta"  
 Ngem no maminsan, saan a gagangay na  
 Ta saan nga amin ket kas kenka  
 ti kinatured ken kinaibtor ti kakadua  
 Gapu ta birbiruken da, kasapulan mi latta  
 sika a doktor mi  
 dagiti balakad ken panagbuyam  
 kadakami nga isursuruum  
 iti pangsalun-at a kaamuan  
 manipud iti nabaknang a kapadasan  
 sika a maestra mi

Ti gangay na ket ti anges a mapugsat  
 iti sangoanan ti naraggas a gubat  
 ngem saan a kadawyan  
 ti panagulimek ken panag-atras  
 Awit mi dagiti kari  
 Itultuloy ti laban tapno magun-od ti hustisya  
 ti dumaranudor a putok  
 ken gumilgil-ayab nga apoy  
 manipud kadagiti armas mi

Daytoy nga aldaw ti pammadayaw  
 kadakayo Ka Lanie ken Ka Pinpin  
 Idaton mi dagiti mapakintayeg a saniweng  
 Ti awan patingga na a panagayat mi..